



L'Ostîr i à pensât un biel pôc parsore, a cheste robe, e dopo al à decidût che al fasarà ce che al sta par dîus:

Il Contecurte Day 2020 si fasarà!

Come che o savê, e cui no lu sa, **il Contecurte Day e je la gare di Contis che par solit o fasìn inte prime metât dal an e al è l'event plui grues de nestre Ostarie, dulà che i contecurtârs plui babios si sfidin cu la lôr conte** par viodi cui che al vinç. O vin tacât a Listize, dopo lu vin fat a Flambri, dopo a Passarian e l'an passât - la supergalatiche edizion dal decim inovâl - a Sclaunic, cun tant di television e super fieste ae fin.

Chest an, pûr trop, o sin jentrâts intun gatul che ancjemò no nus fâs viodi un fregul di lûs e nus tocje tignî cont di leçs plui grandis di nô, ma no par chest o vin di butâsi jù e fâsi cjapâ de maluserie. Come che o savê, l'Ostîr di mestîr al insegne economie, e al sa ben che **al è propite tai moments plui bruts che no bisugne rindisi e anzit, si pues tirâ fûr alc di biel e di gnûf**. E cun di plui, come che us vin dit, la neste rispueste e je chê dal **CoroneCurte: i din sot cu lis contis, us regalìn poesiis dal balon su facebook e ve chi... no vin voie di anulâ il Contecurte day, ma lu fasarin come simpri e al sarà dut in version digjitâl!**

Di sigure al manjarà il plasê di gjoldisi la scolte des contis in cjar e vues, ma la nestre Sartore e je za in plene vore par podê garantî di podê scoltâ lis contis e o viodarês che se la cjapìn ben e sarâ une biele maniere di dâi cuintri a chest moment e **al saltarà fûr un**

Contecurte Day che nol varà nuie di mancul di chei altris.... Si che duncje, pocjts cjacâris e velis chi lis regulis:

A scomençâ di cumò, **dai 23 di Març e fintremai ae dì di Pasche**, o podarês inviâ la vuestre Conte **ae solite direzion di pueste** par partecipâ al **Contecurte Day 2020 che o vin ben pensât di clamâ COVIDCURTE DAY 20**.

La conte e je a teme libar e al baste che e stedi sot des solitis 2000batudis, spazis comprendûts. Lis contis, a vignaràn publicadis vie vie sul nestri sît, in maniere anonime, e a podaran jessi votadis, dopo Pasche, di **ducj chei che a son iscrits ae nestre liste di Contecurte (chê de Conte dal Mês, insome)**!

Lis votazions a tacaran dopo che si è sierade la publicazion des contis, ven a stâi dopo Pasche, secont modalitât che viodarin, a seconde di tropis contis che o rivin. Par cumò si fermìn cul invidâus ducj a scomençâ a pensâ a une biele storie di contânus. **Al sarà il nestri Decameron furlan**, achì, sierâts in cjase, ma ducj insieme a contâsi storiis, come che si faseve une volte tes stalis.

E mai come chest an, nol è impuartant cui che al vinç, ma al è impuartant partecipâ, jessi presints, contâ une storie... **parcè che o sin lis storiis che o contin, e o vin inmò une vore di contis di contâ!**

Scriveit. Leieit. Partecipait. Sparniçait!